



*Rabu, 15 Agustus 2024*  
**Ogen : 1 Korinti 9: 14-18**



**La Kutuntut Hakku**



**P**aulus erbahan sada pledoi (pembelaan) alu bentuk penungkunen guna nuriken man perpulungen Korinti kerna hak dingen tanggung jawab Rasul. Adi si pergermetken i bas bindu 9 enda lit 17 penungkunen si isehken Paulus alu la mindo jabapen arah perpulungen e sabap jabapenna lit i bas penungkunenna e. Adi si perdiateken maka lit 3 analogi si ibahan Paulus guna nuriken ras nuntut kerna hakna (ay.7).

1. Lit kin perajurit si ikut erperang alu biayana jine?
2. Lit kin perjuma si la man buah anggur si isuanna i bas kebun anggurna?
3. Lit kin permakan si la kenan susu asuh-asuhenna?

Nggo sewajarna sekalak si erdahin ngaloken upah i bas dahinna nari. Labo salah adi sekalak si nuan benih Kata Dibata ngaloken si mulih i bas perpulungen si ielaina. Tapi Paulus la ngelakoken si bagenda rupana, la ituntutna hak na. Rela ia guna erbahan dahinna guna ncukupi keperluan geluhna alu la erbansa perpulungen e terbeban. Paulus ngidah pentingen kerna kewajiben asangkan hak. Ula erkiteken masalah hak piahna lupa kewajiben si penting e me meritaken Berita Si Meriah.

Terdauhen ikataken Paulus maka kalak si erdahin i bas Rumah Pertoton ngaloken pangan i bas Rumah Pertoton nari. Emaka kalak si meritaken Berita Si Meriah nggeluh ras ngaloken keperluanna arah dahin i bas meritaken Berita Si Meriah. Enda nurikensa maka ula min ibahan dahin pelayanen e jadi mata pencaharian guna keperluan geluh si lalap menuntut kerna upah, piahna labo lit bedana ras aron ku juma ras buruh pabrik. Paulus tetap i bas esensi pelayanen e me maba perpulungen guna ngaloken keselamatanen i bas Tuhan ras mpermuliaken Tuhan i bas geluhna. Soal hak e me upah ras kesejahteraan geluh labo jadi tujun i bas meritaken Berita Si Meriah. Perberita si meriah meteh maka geluhna ijamini Tuhan janah labo arah upah si ialokenna